

四庫全書

集部

欽定四庫全書

集部

御定全唐詩錄卷九十三
四

詳校官左中允_臣 瑋五珠

主事銜_臣 徐以坤覆勘

總校官原任中允_臣 王燕緒

校對官中書_臣 田尹衡

校對官中書_臣 王鍾泰

謄錄監生_臣 鍾 浩

謄錄監生_臣 閻學朱

欽定四庫全書

御定全唐詩錄卷九十三

韓偓

偓字致光

紀事云本字致堯史云致光誤

京兆萬年人擢進士第

累翰林學士中書舍人劉季述之變佐崔胤反正
為功臣隨幸岐下遷兵部侍郎進承旨還京昭宗
益加信任欲相者三四讓不敢當以薦趙崇貳於
允朱全忠欲罪之允不為解貶濮州司馬昭宗執

手涕別歎左右自此無人再貶榮懿尉徙鄧州司馬天祐中復原官不赴召挈族南依王審知偃十

歲能詩嘗即席為詩送父友李商隱一坐盡驚

商隱

集贈韓冬郎詩有十歲裁詩走馬成及雛鳳清於老鳳聲之句冬郎偃小字父瞻開成中商隱同年

也富才情詞靡麗初喜為閨閣詩後遭故遠遁出

語依於節義得詩人之正焉自號玉山樵人

石林葉氏曰唐史偃傳貶濮州後即不甚詳吾家所得偃詩皆以甲子歷歷自記有天祐二年乙丑

在素州得人賀復除戎曹依舊承旨詩又有丁卯
年聞再除戎曹依前充職詩蓋兩召皆辭不赴也
終身不食梁祿大節與司空表聖略相等惜乎唐
史止書乙丑一召不為少發明之

晁公武曰偃有君子之道四焉唐之末南北分崩
而忘其君偃雖崔允門生獨能棄家從上一也其
時搢紳無不交通内外以躡取爵祿偃獨能力辭
相位二也不肯草韋貽範起復麻三也不肯致拜

於朱溫四也詩曰風雨如晦鷄鳴不已偓之謂矣
而宋子京薄之奈何

南唐近事云偓捐館日有一篋緘鐫甚密家人意
其中必有珍玩發觀之惟得燒殘龍鳳燭百餘條
蠟淚尚新蓋在翰院日昭宗召對金鑾深夜宮妓
秉燭以送偓悉藏之識不忘也

古體詩

幽獨

幽獨起侵晨山鶯啼更早門巷掩蕭條落花滿芳草煙
和魂共遠春與人同老默默又依依淒然此懷抱

雨中

青桐承雨聲聲聲何重疊疎滴下高枝次打欹低葉鳥
濕更梳翎人愁方挂頰獨自上西樓風襟寒帖帖

南亭

每日在南亭南亭似僧院人語靜先聞鳥啼深不見松
瘦石稜稜山光溪澱澱澱澱蔓蔓墜長葦島花垂小簷行簷

隱士冠卧讀先賢傳更有興來時取琴彈一遍

出官經硤石縣

謫官過東畿所抵州名濮故里欲清明臨風堪慟哭溪
長柳似帷山暖花如醖逆旅訝簪裙野老悲陵谷暝鳥
影連翩驚狐尾燾邀尚得佐方州信是皇恩沐

暴雨

電尾燒黑雲雨脚飛銀線急點濺池心微煙昏水面氣
涼氛浸消暑退松篁健叢蓼亞頽茸擎荷翻綠扇風期

誰與同逸趣余探遍欲去更遲留胸中久交戰

閒步

莊南縱步遊荒野獨鳥寒煙輕惹惹傍山疎雨濕秋花
僻路淺泉浮敗果樵人相聚指驚磨牧童四散收嘶馬
一壺傾盡未能歸黃昏更望諸烽火

近體詩

寄京城親友

苦吟看墜葉寥落共天涯壯歲空為客初寒更憶家雨

牆經月蘚山菊向陽花因味碧雲句傷哉後會賒

歲九月在蕭灘鎮駐泊兩月忽得商馬楊迢負外
書賀余復除戎曹依舊承旨還緘後因批四十

字

旅寓在江郊秋風正寂寥紫泥虛寵獎白髮已漁樵事
往淒涼在時危志氣銷若為將朽質猶擬杖於朝

向隅

守道得途遲中兼遇亂離剛腸成繞指玄髮轉垂絲客

路少安處病床無穩時弟兄消息絕獨歛向隅眉

社後

社後重陽近雲天淡薄間目隨碁客靜心共睡僧閒歸
鳥城銜日殘虹雨在山寂寥思晤語何夕欸柴關

息慮

息慮狎群鷗行藏合自由春寒宜酒病夜雨入鄉愁道
向危時見官因亂世休外人相待淺獨說濟川舟

信筆

春風狂似虎春浪白於鵝柳密藏煙易松長見日多生
涯採芝叟鄉俗摘茶歌道在無伊鬱天將奈爾何

感事三十四韻

紫殿承恩歲金鑒入直年人歸三島路日過八花塼鴛
鷺皆廻席臯夔亦慕羶慶霄舒羽翼塵世有神仙雖遇
河清聖慙非岳降賢皇慈容散拙公議逼陶甄江總參
文會陳暄侍狎筵腐儒親帝座太史認星躔側弁聆神
算濡毫俟密宣宮司持玉硯書省擘香牋

宮司書省皆
官人職名

推理心無黨憐才膝屢前焦勞皆實錄宵旰豈虛傳始
議新堯歷將期整舜絃去梯言必盡仄席意彌堅上相
思懲惡中人詎省憊鹿窮唯觝觸兔急且獬豸本是謀
賒死因之致劫遷氛霾言下合日月暗中懸恭顯誠甘
罪韋平亦恃權畏聞巢幕險寧寤積薪燃諒直尋鉗口
奸纖益比肩晉讒終不解魯瘠竟難痊祗擬誅黃皓何
曾識霸先嗾葵翻醜正養虎欲求全萬乘煙塵裏千官
劍戟邊斗魁當北折地軸向西偏素董非徒爾師昭豈

偶然中原成劫火東海遂桑田
濺血慙嵇紹遲行笑褚淵
四夷同效順一命敢虛捐
山岳還青聳穹蒼舊碧鮮
獨夫長歔泣多士已忘筌
鬱鬱空狂叫微微幾病癲
丹梯倚寥廓終去問青天

守愚

深院寥寥竹蔭廊披衣欹枕過年芳
守愚不覺世途險無事始知春日長
一畝落花園隙地半竿濃日界空牆
今來自責趨時懶翻恨松軒書滿床

睡起

睡起牆陰下藥欄瓦松花白閉柴關斷年不出僧嫌癖
逐日無機鶴伴閒塵土莫尋行止處煙波長在夢魂間
終撐舴艋稱漁叟賒買湖心一崦山

半醉

水向東流竟不回紅顏白髮遞相催壯心暗逐高歌盡
往事空因半醉來雲護鴈霜籠淡月雨連鶯曉落殘梅
西樓悵望芳菲節處處斜陽草似苔

三月

辛夷才謝小桃發踏青過後寒食前四時最好是三月
一去不回惟少年吳國地遙江接海漢陵魂斷草連天
新愁舊恨真無奈須就鄰家甕底眠

惜春

願言未偶非高卧多病無心選勝遊一夜雨聲三月盡
萬般人事五更頭年逾弱冠即為老節過清明却似秋
應是西園花已落滿溪紅片向東流

傷春

三月光景不忍看五陵春色何摧殘窮途得志反惆悵
飲席話舊多闌珊中酒向陽成美睡惜花衝雨覺傷寒
野棠飛盡蒲根暖寂寞南溪倚釣竿

春盡

惜春連日醉昏昏醒後衣裳見酒痕細水漾花歸別浦
斷雲含雨入孤村人間易得芳時恨地勝難招自古魂
慙愧流鶯相厚意清晨猶為到西園

冬日

蕭條古木銜斜日
淅瀝晴寒滯蚤梅
愁處雪煙連野起
靜時風竹過牆來
故人每憶心先見
新酒偷嘗手自開
景狀入詩兼入畫
言情不盡恨無才

傷亂

岼上花根總倒垂
水中花影幾千枝
一枝一影寒山裏
野水野花清露時
故國幾年猶戰鬪
異鄉終日見旌旗
交親流落身羸病
誰在誰亡兩不知

歸紫閣下

一笈攜歸紫閣峰
馬蹄閒慢水溶溶
黃昏後見山田火
隴臆時聞縣郭鐘
瘦竹迸生僧坐石
野藤纏殺鶴翹松
釣磯自別經秋雨
長得莓苔更幾重

重遊曲江

追尋前事立江汀
漁者應聞太息聲
避客野鷗如有感
損花微雪似無情
疎林自覺長堤在
春水空連古岸平
惆悵引人還到夜
鞭鞘風冷柳煙輕

曲江夜思

鼓聲將絕月斜痕
園外閒坊半掩門
池裏紅蓮迎白露
苑中青草伴黃昏
林塘閨寂偏宜夜
煙火稀疏便似邨
大底世間幽獨景
最關詩思與離魂

早發藍關

關門愁立候雞鳴
搜景馳魂入杳冥
雲外日隨千里鴈
山根霜共一潭星
路盤暫見樵人火
棧轉時聞驛使鈴
自問辛勤緣底事
半年驅馬傍長亭

老將

折槍黃馬倦塵埃掩耳凶徒怕疾雷
雪密酒酣偷號去月明衣冷斫營迴
行驅貔虎披金甲立聽笙歌擲玉杯
坐久不須輕矍鑠至今雙臂硬弓開

午睡夢江外兄弟

長日居閒門不開遶門青草絕塵埃
空庭日午獨眠覺旅夢天涯相見迴
鬢向此時應有雪心從別處即成灰
如何水陸三千里幾月書郵始一來

見別離者因贈之

征人草草盡戎裝
征馬蕭蕭立路傍
樽酒闌珊將遠別
秋山迤邐更斜陽
白髭兄弟中年後
瘴海程途萬里長
曾向天涯懷此恨
見君嗚咽更淒涼

過臨淮故里

交遊昔歲已凋零
第宅今來亦變更
舊廟荒涼時饗絕
諸孫饑凍一官成
五湖竟負他年志
百戰空垂異代名
榮盛幾何流落久
遣人襟抱薄浮生

疎雨

疎雨從東送疾雷
小庭涼氣淨莓苔
卷簾燕子穿人去
洗硯魚兒觸手來
但欲進賢求上賞
唯將拯溺作良媒
戎衣一掛清天下
傳野非無濟世才

六月十七日召對自辰及申方歸本院

清水簾開散異香
恩深咫尺對龍章
花應洞裏常時發
日向壺中特地長
坐久忽疑查犯斗
歸來兼恐海生桑
如今冷笑東方朔
唯用詆諧侍漢皇

中秋禁直

星斗疎明禁漏殘，紫泥封後獨凭欄。
露和玉屑金盤冷，月射珠光貝闕寒。
天襯樓臺籠苑外，風吹歌管下雲端。
長卿祇為長門賦，未識君臣際會難。

雨後月中玉堂閒坐

銀臺直北金鑾外，暑雨初晴皓月中。
唯對松篁聽刻漏，更無塵土翳虛空。
綠香熨齒冰盤果，清冷侵肌水殿風。
夜久忽聞鈴索動，玉堂西畔響丁東。

禁署嚴密，非本院人雖有公事不敢

遽入至於內夫人宣事亦先引鈴每有文書即內臣立於門外鈴聲動本院小判官出受受訖授院使院使授學士

苑中

上苑離宮處處迷相風高與露盤齊金堦鑄出狻猊立

玉柱雕成拂秣

一作秣拂又作翡翠

啼外使調鷹初得按

五方外按使以

鷹隼初調習始能擒獲謂之得按

中官過馬不教嘶

上每乘馬必闔官馭以進謂之過馬

既乘之而後踐蹂嘶鳴

笙歌錦繡雲霄裏獨許詞臣醉似泥

宮柳

莫道秋來芳意違
宮娃猶似妒娥眉
幸當玉輦經過處
不怕金風浩蕩時
草色長承垂地葉
日華先動映樓枝
澗松亦有凌雲分
爭似移根太液池

冬十一月駕幸岐下作

曳裾談笑殿西頭
忽聽征鐃從冕旒
鳳蓋行時移紫氣
鸞旗駐處認皇州
曉題御服頒羣吏
夜發宮嬪詔列侯
雨露涵濡三百載
不知誰擬殺身酬

寄湖南從事

索寞襟懷酒半醒
無人一為解餘酲
岸頭柳色春將盡
船背雨聲天欲明
去國正悲同旅鴈
隔江可忍更啼鶯
蓮花幕下風流客
試與溫存譴逐情

贈湖南李思齊處士

兩板船頭濁酒壺
七絲琴畔白髭鬚
三春日日黃梅雨
孤客年年青草湖
燕俠冰霜難狎近
楚狂鋒刃觸凡愚
知余絕粒窺仙事
許到名山看藥爐

欲明

欲明籬被風吹倒過午門因客到開忍苦可能遭鬼笑
息機應免致鷗猜岳僧互乞新詩去酒保頻徵舊債來
唯有狂吟與沈飲時時猶自觸靈臺

小隱

借得茅齋岳麓西擬將身世老鋤犁清晨向市煙含郭
寒夜歸村月照溪爐為窓明僧偶坐松因雪折鳥驚啼
靈椿朝菌由來事却笑莊生始欲齊

避地

西山爽氣生襟袖南浦離愁入夢魂人泊孤舟青草岬
鳥鳴高樹夕陽村偷生亦似符天意未死深疑負國恩
白面兒郎猶巧宦不知誰與正乾坤

登南神光寺塔院

無奈離腸易九迴強攄離抱立高臺中華地向城邊盡
外國雲從島上來四序有花長見雨一冬無雪却聞雷
日宮紫氣生冠冕試望扶桑病眼開

秋深閒興

此心兼笑野雲忙甘得貧閒味甚長病起乍嘗新橘柚
秋深初換舊衣裳晴來喜鵲無窮語雨後寒花特地香
把釣覆碁兼舉白不離名教可顛狂

秋郊閒望有感

楓葉微紅近有霜碧雲秋色滿吳鄉魚衝駭浪雪鱗健
鴉閃殘陽金背光心為感知長慘感鬚綠經亂早蒼浪
可憐廣武山前語楚漢虛教作戰場

己巳年正月十二日自沙縣抵邵武軍將謀撫信

之行到纔一夕為閩相急脚相召卻請赴沙縣
郊外泊船偶成一篇

訪戴船迴郊外泊故鄉何處望天涯半明半暗山村日
自落自開江廟花數醖綠醅桑落酒一甌香沫火煎茶
闕

卜隱

屏跡還應減是非却憂藍玉又光輝桑梢出舍蠶初老
柳絮蓋溪魚正肥世亂豈容長愜意景清還覺易忘機

世間華美無心問
藜藿充腸芋作衣

江岼閒步

一手攜書一杖筇
出門何處覓情通
立談禪客傳心印
坐睡漁師著背篷
青布旗誇千日酒
白頭浪吼半江風
淮陰市裏人相見
盡道途窮未必窮

殘春旅舍

旅舍殘春宿雨晴
恍然心地憶咸京
樹頭蜂抱花鬚落
池面魚吹柳絮行
禪伏詩魔歸靜域
酒衝愁陣出奇兵

兩梁免被塵埃污拂拭朝簪待眼明

安貧

手風慵展八行書眼暗休尋九局圖
牕裏日光飛野馬
按頭筠管長蒲盧
謀身拙為安蛇足報國危曾捋虎鬚

舉世可能無默識未知誰擬試齊筭

太平廣記云昭宗嘗面許偓為相奏

云陛下運籌中興當復用重德鎮風俗臣座主右僕射趙崇可充是選乞迴臣之命授崇天下幸甚上喜歎翌日制用崇暨兵部侍郎王贊為相全忠聞之馳入請見於上前且言二公長短上曰趙崇是偓薦時偓在側全忠叱之偓奏曰臣不敢與大臣爭上曰韓偓出尋謫官詩謀身云云此也按史稱偓直內禁屢參密謀為全

忠所忌又待宴時全忠臨陞宣事衆皆去席俛守禮不為動全忠以為薄已其云危捋虎鬚非獨薦趙崇一事也廣記似覺未盡

贈僧

盡說歸山避世塵
幾人終肯別囂氛
瓶添澗水盛將月
衲掛松枝惹得雲
三接舊承前席遇
一靈今用戒香熏
相逢莫話金鑾事
觸撥傷心不願聞

南安寓止

此地三年偶寄家
枳籬茅屋共桑麻
蝶矜翅暖徐窺草

蜂倚身輕凝去聲看花天近函關屯瑞氣水侵吳甸浸晴

霞豈知卜肆嚴夫子潜指星機認海查

野釣

細雨桃花水輕鷗逆浪飛風頭阻歸棹坐睡倚蓑衣

從獵

獵犬諳斜路宮嬪識認旗馬前雙兔起宣示羽林兒
小鐙狹鞭鞘鞍輕妓細腰有時齊走馬也學唱交交
蹀躞巴陵駿毬毬碧野鷄忽聞仙樂動賜酒玉偏提

思歸樂

晚日催絃管春風入綺羅杏花如有意偏落舞衫多

招隱

立意忘機機已生可能朝市污高情時人未會嚴陵志
不釣鱸魚只釣名

使風

茶香睡覺心無事一卷黃庭在手中欹枕捲簾江萬里
舟人不語滿帆風

阻風

平生情趣羨漁師
此日煙江愜所思
肥鰕香粳小艖艣
斷腸滋味阻風時

秋霖夜憶家

垂老何時見弟兄
背燈愁泣到天明
不知短髮能多少
一滴秋霖白一莖

曛黑

古木侵天日已沈
露華涼冷潤衣襟
江城曛黑人行絕

唯有啼鳥伴夜碁

醉著

萬里清江萬里天一村桑柘一村煙漁翁睡著無人喚
過午醒來雪滿船

柳

一籠金線拂彎橋幾被兒童損細腰無奈靈和標格在
春來依舊裏長條

翠碧鳥

天長水遠網羅稀
保得重重翠羽衣
挾彈小兒多害物
勸君莫近市朝飛

家書後批二十八字

四序風光總是愁
鬢毛衰颯涕橫流
此書未到心先到
想見孤城海岸頭

荔枝

遐方不許貢珍奇
密詔唯教進荔枝
漢武碧桃爭比得
枉令方朔號偷兒

封開玉籠雞冠澁葉襯金盤鶴頂鮮想得佳人微啟齒
翠釵先取一枝懸

巧裁霞片裏神漿崖蜜天然有異香應是仙人金掌露
結成冰入茜羅囊

鄭左丞入洛一絕請為申達京洛親友知余病廢
鬢惹新霜耳舊聾眼昏腰曲四肢風交親若要知形候
嵐嶂煙中折臂翁

自沙縣抵尤溪縣值泉州軍過後村落皆空因有

一絕

水自潺湲日自斜
盡無鷄犬有鳴鴉
千村萬落如寒食
不見人煙空見花

即目

書牆暗記移花日
洗甕新知醞酒期
須信閒人有忙事
早來衝雨覓漁師

訪隱者遇沈醉書其門而歸

曉入江村覓釣翁
釣翁沈醉酒缸空
夜來風起閒花落

狼藉柴門鳥徑中

寄鄰莊道侶

聞說經旬不啟關
藥牕誰伴醉開顏
夜來霜壓村前竹
剩見溪南幾尺山

香奩集

附

偓自序曰余溺章句信有年矣誠知非丈夫所為
不能忘情天所賦也自庚辰辛巳之際迄辛丑庚
子之間所著歌詩不啻千首其間以綺麗得意者

亦數百篇往往在士大夫之口或樂工配入聲律
粉牆椒壁斜行小字竊咏者不可勝計大盜入關
緇帙都墜遷徙不常厥居求生草莽之中豈復以
吟諷為意或天涯逢舊識或避地遇故人醉咏之
暇時及拙唱自爾鳩輯復得百篇不忍棄捐隨時
編錄遐思宮體未敢稱庾信攻文却謂玉臺何必
倩徐陵作序麤得捧心之態幸無折齒之慚柳巷
青樓未嘗糠粃金閨繡戶始預風流咀五色之靈

芝香生九竅咽三危之瑞露春動七情如有責其
不經亦望以功掩過翰林學士承旨行尚書戶部
侍郎知制誥韓偓序

石林葉氏曰世傳香奩集江南韓熙載所為誤沈
存中筆談又謂漢相和凝所為後貴惡其側艷嫁
名於偓亦非也余家有唐吳融詩一集其中有和
韓致堯無題三首與香奩集中無題韻正同而偓
序中亦具載其事又余曾在溫陵於偓裔孫垺處

見倭親書所作詩一卷雖紙墨昏淡而字畫宛然
其袅娜多情春盡等詩多在卷中此可驗矣倭富
於才情詞致婉麗能道人意外事固非凝所及據
北夢瑣言云凝少年好為小詞令布於汴洛洎作
相專令人收拾焚毀契丹入寇號為曲子相公然
則凝雖有集名香奩與倭同乃浮艷小詞耳安得
便以今世所行香奩集為凝作耶

古體詩

春晝

春融艷艷大醉陶陶漏添遲日箭減良宵藤垂戟戶柳
拂浮橋簾幙燕子池塘伯勞膚清臂瘦衫薄香銷楚殿
衣窄南朝髻高河南縣遠清波地遙絲纏露泣各自無
慘

五更

秋雨五更頭桐竹鳴騷眉却似殘春間斷送花時節空
樓鴈一聲遠屏燈半滅繡被擁嬌寒眉山正愁絕

意緒

絕代佳人何寂寞梨花未發梅花落東風吹雨入西園
銀線千條度虛閣粉臉難勻蜀酒濃口脂易印吳綾薄
嬌嬈意緒不勝羞願倚郎肩永相著

後魏時相州人作李波小妹歌疑其未備因補之

李波小妹字雍容窄衣短袖蠻錦紅未解有情夢梁殿
何曾自媚妒吳宮誰教牽引知酒味因令悵望成春慵
海棠花下鞦韆畔背人撩鬢道忽忽

北史廣平人李波宗族強盛殘掠不

已公私咸患百姓為之語曰李波小妹字雍容褰裙逐馬如卷蓬左射右射必叠雙婦女尚如此男子安可逢相州刺史李安世設方畧誘波等殺之宋姚寬以為本辭無關閨情所補不合然安知當時不別有所感托之此女子乎

近體詩

幽牕

刺繡非無暇幽窓自甚歡手香江橘嫩齒軟越梅酸密約臨行怯私書欲報難無憑諳鵲語猶得暫心寬

馬上見

驕馬錦連乾乘騎是謫仙和裙穿玉鐙隔袖把金鞭去
帶懽騰醉歸成困頓眠自憐輸廐吏餘暖在香羈

欲去

紛紜隔窓語重約踏青期縱得相逢處無非欲去時恨
深書不盡寵極意多疑惆悵桃源路惟教夢寐知

信筆

睡髻休頻攏春眉忍更長整釵梳子重泛酒菊花香繡
疊昏金色羅揉損研光有時閒弄筆亦畫兩鴛鴦

懶起

百舌惱朝眠春心動幾般枕霞紅黯淡淚粉玉闌珊籠
繡香煙歇屏山燭焰殘暖憐羅襪窄瘦覺錦衣寬昨夜
三更雨臨明一陣寒海棠花在否側卧捲簾看

春悶偶成十二韻

阡陌懸雲壤欄畦隔艾芝路遙行雨嬾河濶過橋遲鴈
足應難達狐蹤浪得疑謝鯤吟未廢張碩夢堪思有意
通情處無言攏鬢時格高歸歛笑歌怨在頻眉醉後金

蟬重歡餘玉燕歆素姿凌白柰圓頰銷紅梨粉字題花
筆香牋詠柳詩繡牕攜手約芳草踏青期別淚開泉脈
春愁眉藕絲相思不相信幽恨更誰知

無題

并序

余自辛酉歲戲作無題十四韻故奉常王公相
國首於繼和故內翰吳侍郎融令狐舍人渙閣
下劉舍人崇舉吏部王負外渙相次屬和余因
作第二首却寄諸公二內翰及小天亦再和余

復作第三首二內翰亦三和王公一首劉紫微
一首王小天二首二學士各三首余又倒押舊
韻成第四首二學士笑謂余曰謹監降旗何妍
如是也遂絕筆是歲十月末余在內直一旦兵
起隨駕西狩文藁咸棄更無孑遺丙寅年九月
在福建寓止有前東都度支院蘇曄端公挈余
淪落詩藁見授中得無題一首因追味舊作缺
亡甚多唯第二第四首彷彿可記其第三首才

得數句而已今亦依次編之以俟他時偶獲全本餘五人所和不復憶省矣

小檻移燈地空房鎖隙塵額波風盡日簾匝月侵晨香
辦更衣後釵梁攏鬢新吉音聞詭計醉語近天真妝好
方長歎歡餘却淺嘆繡屏金作屋絲幃玉為輪致意通
綿竹精誠託錦鱗歌凝眉際恨酒發臉邊春溪紆殊輕
越樓簫豈羨秦柳虛襍沴氣梅實引芳津樂府降清唱
宮厨減食珍防閒襟併歛忍妬淚休勻宿飲愁縈夢春

寒瘦著人手持雙豈菟的的為東鄰

碧瓦偏光日紅簾不受塵柳昏連綠野花爛爍清晨書
密偷看數情通破體新明言終未實暗祝始應真枉道
嫌偷藥推誠鄙效嚙合成雲五色宜在月中輪照獸金
塗爪釵魚玉鏤鱗渺瀰三島浪平遠一樓春墮髻還名
壽修蛾本姓秦棹尋聞大洞槎入飲牛津麟脯隨重釀
霜鱗間八珍錦衾霞彩爛羅襪研光勻羞澁佯牽伴嬌
嬈欲泥人偷兒難捉搦慎莫共比鄰

紫蠟融花蒂紅綿拭錦塵夢狂翻惜夜妝嬾厭凌晨茜
袖啼痕數香牋墨色新

從此
失記

第四倒押前韻

白

一作查

下歸同路烏衣枉作鄰珮聲猶隔箔香氣已迎

人酒勸杯須滿書羞字不勻歌憐黃竹怨味實碧桃珍
剪燭非良策當關是要津東阿初渡洛楊惲舊家秦粉
化橫波溢衫輕曉霧春鵲黃雙鳳翅麝月半魚鱗別袂翻
如浪迴腸轉似輪後期纔注脚前事又含顰縱有才難

詠寧無畫逼真
天香聞更有瓊樹見
長新鬬草長更僕
迷鬬悞達晨嗅
花判不得檀注惹芳塵

六言

春樓處子傾城
金陵狎客多情
朝雲暮雨會合
羅襪繡被逢迎
華山梧桐相覆
蠻江荳蔻連生
幽歡不盡告別
秋河悵望平明

一燈前雨落夜
三月盡草青時
半寒半暖正好
花開花謝相思
惆悵空教夢見
懊惱多成酒悲
紅袖不乾誰會

揉損聯娟淡眉

橫塘

秋寒灑背入簾霜
鳳脰燈青照洞房
蜀紙麝煤添筆媚
越甌犀液發茶香
風飄亂點更籌轉
拍送繁絃曲破長
散客出門斜月在
兩眉愁思向橫塘

五更

往來曾約鬱金牀
半夜潛身入洞房
懷裏不知金鈿落
暗中唯覺繡鞋香
此時欲別魂俱斷
自後相逢眼更狂

光景旋消惆悵在一生贏得是淒涼

詠浴

再整魚犀攏翠簪解衣先覺冷森森教移蘭燭頻羞影
自試香湯更怕深初似洗花難抑按終憂沃雪不勝任
豈知侍女簾幃外賸取君王幾餅金

倚醉

倚醉無端尋舊約却令惆悵轉難勝靜中樓閣深春雨
遠處簾櫳半夜燈抱柱立時風細細遶廊行處思騰騰

分明窓下聞裁剪敲遍闌干喚不應

有憶

晝漏迢迢夜漏遲傾城消息杳無期
愁腸泥酒人千里淚眼倚樓天四垂
自笑計狂多獨語誰憐夢好轉相思
何時斗帳濃香裏分付春風與玉兒

袅娜

袅娜腰肢淡薄妝六朝宮樣窄衣裳著詞但見櫻桃破
飛盞遙聞苧蔻香春惱情懷身覺瘦酒添顏色粉生光

此時不敢分明道風月應知暗斷腸

偶見

千金莫惜早蓮生

一作買娉婷

一笑從教下蔡傾仙樹有花

難問種御香聞氣不知名愁來自覺歌喉咽瘦去誰憐
舞掌輕小疊紅箋書恨字與奴方便寄卿卿

閨情

輕風滴磔動簾鉤宿酒猶酣懶卸頭但覺夜深花有露
不知人靜月當樓何郎燭暗誰能咏韓壽香銷亦任偷

敲折玉釵歌轉咽一聲聲入兩眉愁

寒食日重遊李氏園亭有懷

往年曾在彎橋上見倚朱欄詠柳綿
今日獨來香徑裏更無人跡有苔錢
傷心濶別三千里屈指思量四五年
料得他鄉過佳節亦應懷抱暗淒然

半睡

擡照仍嫌瘦更衣又怕寒宵分未歸帳
半睡待郎看

春閨

願結交加夢因傾漱灩尊醒來情緒惡簾外正黃昏
氤氲帳裏香薄薄睡時妝長吁解羅帶怯見上空牀

效崔國輔體

淡月照中庭海棠花自落獨立俯閒堦風動鞦韆索
酒力滋睡眸鹵莽聞街鼓欲明天更寒東風打牕雨
雨後碧苔院霜來紅葉樓閒堦上斜日鸚鵡伴人愁
羅幕生春寒繡牕愁未眠南湖夜來雨應濕采蓮船

宮詞

繡屏斜立正銷魂
侍女移鐙掩殿門
燕子不歸花著雨
春風應自怨黃昏

閨怨

時光潛去暗淒涼
嬾對菱花暈晚妝
初拆鞦韆人寂寞
後園青草任他長

寒食夜

惻惻輕寒剪剪風
杏花飄雪小桃紅
夜深斜搭鞦韆索
樓閣朦朧細雨中

寒食夜有寄

風流大抵是悵悵一度相思一斷腸
雲薄月昏寒食夜
隔簾微雨杏花香

新秋

一夜清風動扇愁
背時容色入新秋
桃花臉裏汪汪淚
忍到更深枕上流

日高

朦朧猶認管絃聲
噤痒餘寒酒半醒
春暮日高簾半捲

落花和雨滿中庭

聞雨

香侵蔽膝夜寒輕
聞雨傷春夢不成
羅帳四垂紅燭背
玉釵敲著枕函聲

已涼

碧闌干外繡簾垂
猩色屏風畫折枝
八尺龍鬚方錦褥
已涼天氣未寒時

深院

鵝兒啞啞梳黃嘴鳳子輕盈膩粉腰深院下簾人晝寢
紅薔薇映碧芭蕉

中庭

夜短睡遲慵蚤起日高方始出紗窓中庭自摘青梅子
先向釵頭帶一雙

江樓

鯉魚苦笋香味新楊花酒旗三月春風光百計牽人老
爭那多情是病身

偶見

鞦韆打困解羅裙指點醞醐索一尊見客入來和笑走
手搓梅子映中門

忍笑

宮樣梳頭淺畫眉晚來妝飾更相宜水精鸚鵡釵頭顫
歛袂佯羞忍笑時

不見

動靜防閑又怕疑佯佯脈脈是沈機此身願作君家燕

秋社歸時也不歸

密意

呵花貼鬢粘寒髮凝酥光透猩猩血經過洛水幾多人
唯有陳王見羅襪

寄恨

秦釵枉斷長條玉蜀紙空留小字紅死恨物情難會處
蓮花不肯嫁春風

新上頭

學梳蟬鬢試新裙消息佳期在此春為要好多心轉惑
遍將宜稱問傍人

半睡

眉山暗淡向殘燈一半雲鬟墜枕稜四體著人嬌欲泣
自家揉損研繚綾

哭花

曾愁香結破顏遲今見妖紅委地時若有情爭不哭
夜來風雨葬西施

御定全唐詩錄卷九十三

欽定四庫全書

御定全唐詩錄卷九十四

韋莊

莊字端已杜陵人見素之孫疎曠不拘小節乾寧
元年第進士授校書郎轉補闕王建開蜀昭宗遣
李珣宣慰兩川辟莊判官行莊以中原多故欲依
建建辟之掌書記尋以起居舍人召建表留以莊
名臣世族恩禮殊厚即僞位拜散騎常侍進吏部

侍郎平章事卒偽謚文靖

莊浣花集弟藹編錄序略云家兄自庚子亂離前
凡著歌詩文章數十通屬兵火迭興簡編俱墜惟
餘口誦者所存無幾爾後流離漂泛寓目緣情迄
於癸亥歲又綴僅千餘首辛酉春應聘為蜀奏記
明年浣花溪尋得杜工部舊址結茅為室思其人
欲成其處藹因錄兄藹或默誦者次為十卷目之
曰浣花集亦杜陵所居之義也後所製用繼於右

時癸亥六月九日

紀事云莊應舉時遇巢寇犯闕著秦婦吟云內庫
燒為錦繡灰天街踏盡公卿骨在位多垂訝莊乃
諱之時號秦婦吟秀才嘗作感懷詩大道不將爐
冶去有心重築太平基之句人謂其包括生成果
為台輔後晚年忽詠句云誰知閒卧意非病亦非
眠及手從雕扇落頭任漉巾偏識者怪其不祥復
吟子美詩白沙翠竹江邨暮相送柴門月色新不

輟是歲果卒花林坊葬於白沙云

古體詩

少年行

五陵豪客多買酒黃金觥醉下酒家樓美人雙翠幃揮
劍邯鄲市走馬梁王苑樂事殊未央年華已云晚

閨月

明月照前除煙華蕙蘭濕清風行處來白露寒蟬急美
人情易傷暗上紅樓立欲言無處言但向姮娥泣

閨怨

戚戚彼何人
明眸利於月
啼妝曉不乾
素面凝香雪
良人去溜石
鏡破金簪折
空藏蘭蕙心
不忍琴中說

平陵老將

白羽金僕姑
腰懸雙轆轤
前年葱嶺北
獨戰雲中虜
馬塞垣老一
身如鳥孤歸
來辭第宅却
占平陵居

乞彩牒歌

浣花溪上如
花客綠閨紅
藏人不識留
得溪頭瑟瑟
波

潑成紙上猩猩色手把金刀裁彩雲有時剪破秋天碧
不使虹霓段段飛一時驅上丹霞壁蜀客才多染不供
卓文醉後開無力孔雀銜來向日飛翩翩壓折黃金翼
我有歌詩一千首磨礪山岳羅星斗開卷長疑雷電驚
揮毫只怕龍蛇走班班布在時人口滿軸松花都未有
人間無處買煙霞須知得自神仙手也知價重連城璧
一紙黃金猶不惜薛濤昨夜夢中來殷勤勸向君邊覓

壽練篇

月華吐艷明燭燭青樓婦唱擣衣曲白袷絲光織魚目
菱花綬帶鴛鴦簇臨風縹緲疊秋雪月下丁東擣寒玉
樓蘭欲寄在何鄉憑人與繫征鴻足

長安春

長安二月多香塵六街車馬聲鱗鱗家家樓上如花人
千枝萬枝紅艷新簾間笑語自相問何人占得長安春
長安春色本無主古來盡屬紅樓女如今無奈杏園人
駿馬輕車擁將去

贈峨嵋山彈琴李處士

峨嵋山下能琴客似醉似狂人不測何須見我眼偏青
未見我身頭已白茫茫四海本無家一片愁雲颺秋碧
壺中醉卧日月明世上長遊天地窄晉朝叔夜舊相知
蜀郡文君小來識後生常建彼何人贈我篇章苦雕刻
名卿名相盡知音遇酒遇琴無間隔如今世亂獨脩然
天外鴻飛招不得余今正泣楊朱淚八月邊城風刮地
霓旌絳旆忽相尋為我尊前橫綠綺一彈猛雨隨手來

再彈白雪連天起淒淒清清松上風咽咽幽幽隴頭水
吟蜂繞樹去不來別鶴引雛飛又止錦鱗不動惟側頭
白馬仰聽空豎耳廣陵故事無人知古人不說今人疑
子期子野俱不見烏啼鬼哭空傷悲坐中詞客皆無語
簾外月華庭欲午為君吟作聽琴歌為我留名係仙譜
近體詩

章臺夜思

清瑟怨遙夜遠絃風雨哀孤燈聞楚角殘月下章臺芳

草已云暮故人殊未來鄉書不可寄秋雁又南迴

延興門外作

芳草五陵道美人金犢車綠奔穿內水紅落過牆花馬
足倦遊客鳥聲歡酒家王孫歸去晚宮樹欲棲鴉

曲江作

細雨曲池濱青袍草色新詠詩行信馬載酒喜逢人性
為無機率家因守道貧若無詩自遣誰奈寂寥春

嘉會里閒居

豈知城闕內有地出紅塵草占一坊綠樹藏千古春馬
嘶遊寺客犬吠探花人寂寂無鐘鼓槐行接紫宸

夏夜

傍水遷書榻開襟納夜涼星繁愁晝熟露重覺荷香蛙
吹鳴還息蛛羅滅又光正吟秋興賦桐影下西墻

早發

早霧濃於雨田深黍稻低出門雞未唱過客馬頻嘶樹
色遙藏店泉聲暗傍畦獨吟三十里城月尚如珪

村居書事

年年耕與釣鷗鳥已相依
砌長蒼苔厚藤抽紫蔓肥
風鶯移樹轉雨燕入樓飛
不覺春光暮遶籬紅杏稀

雨後晚眺

入谷路縈紆巖巔日欲晡
嶺雲寒掃蓋溪雪凍粘鬚
卧草跼如兔聽水怯似狐
仍聞關外火昨夜徹皇都

宿山家

山行侵夜到雲竇一星燈
草動蛇尋穴枝搖鼠上藤
背

風開藥竈向月展魚簪
明日前溪路煙蘿更幾層

潁陽縣

琴堂連少室故事即仙蹤
樹老風聲壯山高臘候濃
雪多庭有鹿縣僻寺無鐘
何處留詩客茆簷倚後峰

紀村事

綠蔓映雙扉循牆一徑微
雨多庭果爛稻熟渚禽肥
釀酒迎新社遙砧送暮暉
數聲牛上笛何處餉田歸

題許仙師院

地古多喬木遊人到且吟院開金鑲蒔門暎綠篁深山
色不離眼鶴聲常在琴往來誰與熟乳鹿在前林

不寐

不寐天將曉心勞轉似灰蚊吟頻到耳鼠鬪競緣臺戶
闇知蟾落林喧覺雨來馬嘶朝客過知是禁門開

春暮

一春春事好病酒起常遲流水綠縈砌落花紅墮枝樓
高喧乳燕樹密闔雛鷗不學山公醉將何自解頤

和友人

圭門同隱士不出動經時靜閱王維畫閒翻褚允棋落
泉當戶急殘月下窓遲却想從來意譙周亦自嗤

春愁

寓思本多傷逢春恨更長露湘竹淚華墮越梅粧睡
怯交加夢閒傾潑灑觴後庭人不到斜月上松篁

晚春

花開疑乍富花落似初貧萬物不如酒四時惟愛春
峨

峨秦氏髻皎皎洛川神風月應相笑年年醉病身

送崔郎中往使西川行在

拜書辭玉帳萬里劍關長新馬杏花色綠袍春草香一
身朝玉陛幾日過銅梁莫戀壚邊醉仙宮待侍郎

潤州顯濟閣曉望

清曉水如鏡隔江人似鷗遠烟藏海島初日照揚州地
壯孫權氣雲凝庾信愁一蓬何處客吟凭釣魚舟

寓言

為儒逢世亂吾道欲何之
學劍已應晚歸山今又遲
故人三載別明月兩鄉悲
惆悵滄江上星星鬢有絲

過當塗縣

客過當塗縣停車訪舊遊
謝公山有墅李白酒無樓
采石花空發烏江水自流
夕陽誰共感寒鷺立汀洲

鐻白

白髮太無情朝朝鐻又生
始因絲一縷漸至雪千莖
不避佳人笑唯慙稚子驚
新年過半百猶歎未休兵

婺州和陸諫議將赴闕懷陽羨山居

望闕路仍遠
子牟魂欲飛
道開燒藥鼎
僧寄卧雲衣
故國饒芳草
他山掛夕暉
東陽雖勝地
王粲奈思歸

建昌渡暝吟

月照臨官渡
鄉情獨浩然
鳥棲彭蠡樹
月上建昌舩
市散漁翁醉
樓深賈客眠
隔江何處笛
吹斷綠楊烟

南遊富陽江中作

南去又南去
此行非自期
一帆雲作伴
千里月相隨
浪

迹花應笑衰容鏡每知鄉園不可問禾黍正離離

婺州水館重陽日作

異國逢佳節憑高獨苦吟一杯今日酒萬里故鄉心水
館紅蘭合山城紫菊深白衣雖不至鷗鳥自相尋

避地越中作

避世移家遠天涯歲已週豈知今夜月還是去年愁露
果珠沉水風螢燭上樓傷心潘騎省華髮不禁秋

信州谿岸夜吟作

夜倚臨谿店懷鄉獨苦吟月當山頂出星倚水湄沈霧
氣漁燈冷鐘聲谷寺深一城人悄悄琪樹宿仙禽

齊安郡

弭棹齊安郡孤城百戰殘傍邨林有虎帶郭縣無官暮
角梅花怨清江桂影寒黍離緣底事撩闕起長歎

寄江南諸弟

萬里逢歸雁鄉書忍淚封吾身不自保爾道各何從性
拙唯多蹇家貧半為慵祇思谿影上卧看玉華峰

歲晏同左生作

歲暮鄉關遠天涯手重攜雪埋江樹短雲壓夜城低寶瑟湘靈怨清砧杜魄啼不須臨皎鏡年長易淒淒

靈席

一閉香閨後羅衣盡施僧鼠偷筵上果蛾撲帳前燈土蝕釵無鳳塵生鏡少菱有時還影響花葉曳香縑

舊居

芳草又芳草故人揚子家青雲容易散白日等閒斜皓

質留殘雪香魂逐斷霞不知何處笛一夜叫梅花

漁塘十六韻

洛水分餘派穿巖出石稜碧經嵐氣重清帶露華澄瑩
徹通三島巖崕積萬層巢由應共到劉阮想同登壁峻
苔如畫山昏霧似蒸撼松衣有雪題石硯生水路熟雲
中客名留域外僧饑猿尋落橡鬪鼠墮高藤嶮樹臨溪
亞殘莎帶岼崩持竿聊藉草待月好垂簷對景思任父
開圖想不興晚風輕浪疊暮雨濕煙凝似泛靈查出如

迎羽客昇仙源終不測勝概自相仍欲別誠堪戀長歸
足未能他時操史筆爲爾著良稱

和薛先輩見寄初秋寓懷即事之作二十韻

玉律初移候清風乍遠襟一聲蟬到耳千炬火燃心嶽
靜雲堆翠樓高日半沈引愁憎暮角驚夢怯殘碁露白
凝湘簟風篁韻蜀琴鳥喧從果爛堦淨任苔侵柿葉添
紅影槐柯減綠陰採珠逢寶窟閱石見瑤林魯殿鏗寒
玉台山激碎金邠堂流桂影陳巷集車音名自張華顯

詞因葛亮吟水深龍易失天遠鶴難尋鑒貌寧慙樂論
才豈謝任義心孤劍直學海怒濤深既覩文兼質翻疑
古在今慙聞紆綠綬即候掛朝簪晚樹連秋塢斜陽暎
暮岑夜蟲方唧唧疲馬正駸駸托跡同吳燕依人似越
禽會隨仙羽化香蟻且同斟

同舊韻

大火收殘暑清光漸惹襟謝莊千里思張翰五湖心暮
角迎風急孤鐘向暝沈露滋三徑草日動四鄰砧簞委

班姬扇蟬悲蔡琰琴方愁丹桂遠已怯二毛侵
斲石迴泉脈移棋就竹陰觸絲蛛墮網避隼鳥
投林貌愧潘郎壁文慙呂相金但埋豐獄氣未
發爨桐音靜笑劉琨舞閒思阮籍吟野花和雨
劔怪石入雲尋跡競終非幻幽閒且自任趨時
慙藝薄託質負恩深美價方稀古清名已絕今
既聞留縞帶詎肯擲著簪遲客虛高閣迎僧出
亂岑壯心徒戚戚逸足自駸駸安羨倉中鼠危
同幕上禽期君調鼎鼐他日俟羊斟

三用韻

素律初迴馭商飈暗觸襟乍傷詩客思還動旅人心蟬
噪因風斷鱗遊見鷺沈笛聲隨晚吹松韻激遙碁地覆
青袍草窓橫綠綺琴煙霄難自致歲月易相侵澗柳橫
孤杓巖藤架密陰瀟湘期釣侶鄠杜別家林遺愧虞卿
壁言依季布金錚鏌聞郢唱次第發巴音螢影衝簾落
蟲聲擁砌吟樓高思共眺寺遠想同尋入夜愁難遣逢
秋恨莫任蝸遊苔徑滑鶴步翠塘深莫問榮兼辱寧論

古與今固窮憐貧牖感舊惜蒿簪晚日舒霞綺遙天倚
黛岑鴛鴦方翾翾驥驥整駸駸未化投陂竹空思出谷
禽感多聊自遣桑落且閒斟

李氏小池亭十二韻

積石亂巉巉庭莎綠不芟小橋低跨水危檻半依巖花
落魚爭唼櫻紅鳥競鵲竹咸切引泉疏地脈掃絮積山嵌

古柳紅綃織新篁紫綺緘養猿秋嘯月放鶴夜棲杉枕
簞溪雲膩池塘海雨鹹語窓雞逞辯舐鼎犬偏饒踏蘚

青粘屐攀蘿綠映衫訪僧舟北渡貰酒日西銜遲客登
高閣題詩遶翠岳家藏何所寶清韻滿琅函

虢州澗東邨居作

東南騎馬出郊坰迴首寒烟隔郡城清澗漲時翹鷺喜
綠桑疎處哺牛鳴兒童見少生於客奴僕驕多倨似兄
試望家田還自適滿畦秋水稻苗平

尹喜宅

荒原秋殿柏蕭蕭何代風烟占寂寥紫氣已隨仙仗去

白雲空向帝鄉消濛濛暮雨春雞唱漠漠寒蕪雪兔跳
欲問靈蹤無處所十洲空濶閬山遙

途中望雨懷歸

滿空寒雨漫霏霏去路雲深鑱翠微牧豎遠當烟草立
饑禽閒傍渚田飛誰家樹壓紅榴折幾處籬懸白菌肥
對此不堪鄉外思荷蓑遙羨釣人歸

桺谷道中作却寄

馬前紅葉正紛紛馬上離情欲斷魂曉發獨辭殘月店

暮程遙宿隔雲村心如嶽色留秦地夢逐河聲出禹門
莫怪苦吟鞭拂地有誰傾蓋待王孫

灞陵道中作

春橋望望水溶溶一桁晴山倒碧峰秦苑落花零露濕
灞陵新酒潑醅濃青龍天矯盤雙闕丹鳳襍褊隔九重
萬古行人離別地不堪吟罷夕陽鐘

秋日早行

上馬蕭蕭襟袖涼路穿禾黍繞宮牆半山殘月露華冷

一岼野風蓮萼香烟外驛樓紅隱隱渚邊雲樹暗蒼蒼
行人自是心如火兔走烏飛不覺長

歎落花

一夜霏微露濕烟曉來和淚喪嬋娟不隨殘雪埋芳草
盡逐香風上舞筵西子去時遺笑靨謝娥行處落金鈿
飄紅墮白堪惆悵少別穠華又隔年

關河道中

槐陌蟬聲柳市風驛樓高倚夕陽東往來千里路長在

聚散十年人不同，但見時光流似箭。
豈知天道曲如弓，平生志業匡堯舜。
又擬滄浪學釣翁。

題盤豆驛水館後軒

極目晴川展畫屏，地從桃塞接蒲城。
灘頭鷺占清波立，原上人侵落照耕。
去雁數行天際沒，孤雲一點淨中生。
憑軒盡日不迴首，楚水吳山無限情。

題裴端公郊居

暫隨紅旆佐藩方，高跡終朝卧故鄉。
已近水聲開澗戶，

更侵山色架書堂蒲生岼脚青刀利桺拂波心綠帶長
莫奪野人樵牧興白雲不識繡衣郎

貴公子

大道青樓御苑東玉欄仙杏壓枝紅金鈴犬吠梧桐院
朱鬣馬嘶楊桺風流水帶花穿巷陌夕陽和樹入簾櫳
瑤池宴罷歸來醉笑說君王在月宮

觀獵

苑牆東畔欲斜暉傍苑穿花兔正肥公子喜逢朝罷日

將軍誇換戰時衣
鶻翻錦翅雲中落
犬帶金鈴草上飛
直到四郊高鳥盡
掉鞍齊向國門歸

訪含弘山僧不遇留題精舍

滿院桐花鳥雀喧
寂寥芳草茂芊芊
吾師正遇歸山日
閒客空題到寺年
池竹閉門教鶴守
琴書開篋任僧傳
人間不自尋行跡
一片孤雲在碧天

咸通

咸通時代物情奢
歡殺金張許史家
破產競留天上樂

鑄山爭買洞中花
諸郎宴罷銀燈合
仙子遊迴壁月斜
人意似知今日事
急催絃管送年華

長年

長年方悟少年非
人道新詩勝舊詩
十畝野塘留客釣
一軒春雨對僧棋
花間醉任黃鶯說
亭上吟從白鷺窺
大道不將爐冶去
有心重築太平基

辛丑年

九衢漂杵已成川
塞上黃雲戰馬閒
但有羸兵填渭水

更無奇士出商山
田園已沒紅塵裏
弟妹相逢白刃間
西望翠華殊未返
淚痕空濕劍文斑

思歸

暖絲無力自悠揚
牽引東風斷客腸
外地見花終寂寞
異鄉聞樂更淒涼
紅垂野岼櫻還熟
綠染迴汀草又芳
舊里若爲歸去好
子期凋謝呂安亡

憶昔

昔年曾向五陵遊
午夜清歌月滿樓
銀燭樹前長似畫

露桃花下不知秋西園公子名無忌南國佳人字莫愁
今日亂離俱是夢夕陽唯見水東流

天井關

太行山上雲深處誰向雲中築女牆短綆詎能垂玉甃
繚垣何用學金湯斷開嵐翠為高壘截斷雲霞作巨防
守吏不教飛鳥過赤眉何路到吾鄉

贈邊將

昔因征遠向金微馬出榆關一鳥飛萬里只攜孤劍去

十年空逐塞鴻歸
手招都護新降虜
身著文皇舊賜衣
只待烟塵報天子
滿頭霜雪為兵機

過舊宅

華軒不見馬蕭蕭
廷尉門人久寂寥
朱檻翠樓為卜肆
玉欄仙杏作春樵
堦前雨落鴛鴦瓦
竹裏苔封螭螭橋
莫問此中銷歇事
娟娟紅淚泣芭蕉

清河縣樓作

有客微吟獨凭樓
碧雲紅樹不勝愁
盤鵬迴印天心沒

遠水斜牽日脚流千里戰塵連上苑九江歸路隔東周
故人此地揚帆去何處相思雪滿頭

觀官軍迴戈

關中羣盜已心離關外猶聞羽檄飛御苑綠莎嘶戰馬
禁城寒月擣征衣漫教韓信兵塗地不及劉琨嘯解圍
昨日屯軍還夜遁滿車空載洛神歸

中渡晚眺

魏王堤畔草如烟有客傷時獨扣舷妖氣欲昏唐社稷

夕陽空照漢山川千重碧樹籠春苑萬里紅霞襯碧天
家寄杜陵歸不得一迴回首一潸然

河內別村業閒題

阮氏清風竹巷深滿谿松竹似山陰門當谷路多樵客
地帶河聲足水禽閒伴爾曹雖適意靜思吾事好霑襟
鄰翁莫問傷時事一曲高歌夕照沈

聞官軍繼至未覩凱旋

嫖姚何日破重圍秋草深來戰馬肥已有孔明傳將畧

更聞王導得神機
陣前鼙鼓晴應響
城上烏鳶飽不飛
何事小臣偏注目
帝鄉遙羨白雲歸

洛北村居

十畝松篁百畝田
歸來方屬太平年
巖邊石室低臨水
雲外嵐峯半入天
鳥勢去投金谷樹
鐘聲遙出上陽烟
無人說得中興事
獨倚斜暉憶仲宣

立春

青帝東來日
馭遲暖烟輕
逐曉風吹
罽袍公子樽前覺

錦帳佳人夢裏知雪圃乍開紅菜甲綵幡新翦綠楊絲
殷勤爲作宜春曲題向花牋帖繡楣

東遊遠歸

扣角千名記已疎劍歌休恨食無魚辭家桺絮三春半
臨路槐花七月初江上欲尋漁父醉日邊時得故人書
青雲不識揚生面天子何由問子虛

王道者

五雲遙指海中央金鼎曾傳肘後方三島路岐空有月

十洲花木不知霜因攜竹杖聞龍氣爲使棋童帶橘香
應笑我曹身是夢白頭猶自學詩狂

陪金陵府相中堂夜宴

滿耳笙歌滿眼花滿樓珠翠勝吳娃因知海上神仙窟
只似人間富貴家繡戶夜攢紅燭市舞衣晴曳碧天霞
却愁宴罷青娥散揚子江頭月半斜

和侯秀才同友生泛舟谿中相招之作

嵇阮相將棹酒船晚風侵浪水侵舷輕如控鯉初離岾

遠似乘槎欲上天
雨外鳥歸吳苑樹
鏡中人入洞庭烟
憑君不用迴舟疾
今夜西江月正圓

觀浙西府相畋遊

十里旌旗十萬兵
等閒遊獵出軍城
紫袍日照金鵝鬪
紅旆風吹畫虎甯
帶箭彩禽雲外落
避鵬寒兔月中驚
歸來一路笙歌滿
更有仙娥載酒迎

題姑蘇凌處士莊

一簇林亭返照間
門當官道不曾關
花深遠岬黃鶯鬧

雨急春塘白鷺閒
載酒客愁吳苑寺
倚樓僧看洞庭山
怪來話得仙中事
新有人從物外還

贈漁翁

草衣荷笠鬢如霜
自說家編楚水陽
滿岬秋風吹枳橘
遶陂烟雨種菰蔣
蘆刀夜鱸紅鱗膩
木甌朝蒸紫芋香
曾向五湖期范蠡
爾來空濶久相忘

汴堤行

欲上隋堤舉步遲
隔雲烽燧叫非時
纔聞破虜將休馬

又道征遼再出師朝見西來為過客暮看東去作浮屍
綠楊千里無飛鳥日落空投舊店基

過內黃縣

相州吹角欲斜陽匹馬搖鞭宿內黃僻縣不容投刺客
野陂時遇射鵬郎雲中粉堞新城壘店後荒郊舊戰場
猶指去程千萬里秣陵烟樹在何鄉

江上題所居

故人相別盡朝天苦竹江頭獨閉關落日亂蟬蕭帝寺

碧雲歸鳥謝家山青州從事來偏熟
泉布先生老漸慳
不是對花長酩酊
永嘉時代不如閒

將卜蘭芷邨居留別

郡中在仕人

蘭芷江頭寄斷蓬
移家空載一帆風
伯倫嗜酒還因亂
平子歸田不為窮
避世飄零人境外
結茅依約畫屏中
從今隱去應難覓
深入蘆花作釣翁

山墅閒題

邈迤前岡壓後岡
一川桑柘好殘陽
主人饋餉炊紅黍

鄰父攜竿釣紫魴靜極却嫌流水鬧閒多翻笑野雲忙
有名不那無名客獨閉衡門避建康

江上逢故人

前年送我曲江西紅杏園中醉似泥今日逢君越谿上
杜鵑花發鷓鴣啼來時舊里人誰在別後滄波路幾迷
江畔玉樓多美酒仲宣懷土莫淒淒

旅中感遇寄呈李祕書昆仲

南望愁雲鑱翠微謝家樓閣雨霏霏劉楨病後新詩少

阮籍貧來好客稀，猶喜故人天外至。
許將孤劍日邊歸，懷鄉不怕嚴陵笑。
只待秋風別釣磯。

江上邨居

本無蹤跡戀柴扃，世亂須教識道情。
顛倒夢魂愁裏得，擷奇詩句望中生。
花緣艷絕栽難好，山爲看多詠不成。
聞道漢軍新破敵，使來仍說近離京。

江邊吟

江邊烽燧幾時休，江上行人雪滿頭。
誰信亂離花不見，

只應惆悵水東流
陶潛政事千杯酒
張翰生涯一葉舟
若有片帆歸去好
可堪重倚仲宣樓

夜雪泛舟遊南溪

大江西面小溪斜
入竹穿松似若耶
兩岫巖風吹玉樹
一灘明月曬銀砂
因尋野渡逢漁舍
更泊前灣上酒家
去去不知歸路遠
棹聲烟裏獨嘔啞

銅儀

銅儀一夜變葭灰
暖律還吹嶺上梅
已喜漢宮今再睹

更驚堯歷又重開
窓中遠岫青如黛
門外長江綠似苔
誰念閉關張仲蔚
滿庭春雨長蒿萊

題袁州謝秀才所居

主人年少已能詩
更有松軒掛夕暉
芳草似袍連徑合
白雲如鳥傍簷飛
但將竹葉消春恨
莫遣楊花上客衣
若有前山好烟雨
與君吟到暝鐘歸

謁巫山廟

亂猿啼處訪高唐
路入烟霞草木香
山色未能忘宋玉

水聲猶似哭襄王朝朝暮暮陽臺下為雨為雲楚國亡
惆悵廟前無限柳春來空鬪畫眉長

鷓鴣

南禽無侶似相依錦翅雙雙傍馬飛孤竹廟前啼暮雨
汨羅祠畔弔殘暉秦人只解歌為曲越女空能畫作衣
懊惱澤家非有恨年年長憶鳳城歸

泛鄱陽湖

四顧無邊鳥不飛大波驚隔楚山微紛紛雨外靈均過

瑟瑟雲中帝子歸
迸鯉似梭投遠浪
小舟如葉傍斜暉
鴟夷去後何人到
愛者雖多見者稀

章江作

杜陵歸客正徘徊
玉笛誰家叫落梅
之子棹從天外去
故人書自日邊來
楊花慢惹霏霏雨
竹葉頻傾滿滿杯
欲問維揚舊風月
一江紅樹亂猿哀

南昌晚眺

南昌城郭枕江烟
章水悠悠浪拍天
芳草綠遮仙尉宅

落霞紅襯賈人船
霏霏閣上千山雨
噫噫雲中萬樹蟬
怪得地多章句客
庾家樓在斗牛邊

桐廬縣作

錢塘江盡到桐廬
水碧山青畫不如
白羽鳥飛嚴子瀨
綠蓑人釣季鷹魚
潭心倒影時開合
谷口閒雲自卷舒
此境只因詞客愛
投文空弔木玄虛

東陽贈別

繡袍公子出旌旗
送我搖鞭入翠微
大抵行人難訴酒

就中辭容易沾衣去時此地題橋去歸日何年佩印歸
無限別情言不得回看谿柳恨依依

西塞山下作

西塞山前水似藍亂雲如絮滿澄潭孤峰漸映湓城北
片月斜生夢澤南變動燒烟烹紫鱖露和香蒂摘黃柑
他年却棹扁舟去終傍蘆花結一菴

鄠杜舊居

却到山陽事事非谷雲谿鳥尚相依阮咸貧去田園盡

向秀歸來父老稀
秋雨幾家紅稻熟
野塘何處錦鱗肥
年年爲獻東堂策
長是蘆花別釣磯

一徑尋村渡碧谿
稻花香澤水千畦
雲中寺遠磬難識
竹裏巢深鳥易迷
紫菊亂開連井合
紅榴初綻拂簷低
歸來滿把如澠酒
何用傷時歎鳳兮

投寄舊知

却將顛顚入都門
自喜烟霄足故人
萬里有家留百越
十年無路到三秦
摧殘不是當時貌
流落空餘舊日貧

多謝青雲好知己莫教歸去重沾巾

題汧陽縣馬跑泉李學士別業

水滿寒塘菊滿籬籬邊無限彩禽飛
西園夜雨紅櫻熟南畝秋風白稻肥
草色自留閒客住泉聲如待主人歸
九霄岐路忙於火官戀斜陽守釣磯

綏州作

雕陰無樹水南流雉堞連雲古帝州
帶雨晚駝鳴遠戍望鄉孤客倚高樓
明妃去日花應笑蔡琰歸時鬢已秋

一曲單于暮烽起扶蘇城上月如鉤

與東吳生相遇

十年身事各如萍白首相逢淚滿纓老去不知花有態
亂來惟覺酒多情貧疑陋巷春偏少貴想豪家月最明
且對一罇開笑口未衰應見泰階平

庭前桃

曾向桃源爛漫遊也同漁父泛仙舟皆言洞裏千株好
未勝庭前一樹幽帶露似垂湘女淚無言如伴息媯愁

五陵公子饒春恨莫引香風上酒樓

病中聞相府夜宴戲贈集賢盧學士

滿筵紅蠟照香鈿一夜歌鍾欲沸天花裏亂飛金錯落
月中爭認繡連乾罇前莫話詩三百醉後寧辭酒十千
無那兩三新進士風流長得飲徒憐

出關

馬嘶烟岬柳陰斜東去關山路轉賒到處因循緣嗜酒
一生惆悵為判花危時祇合身無著白日那堪事有涯

正是灞陵春耐綠仲宣何事獨辭家

過樊川舊居

却到樊川訪舊遊夕陽衰草杜陵秋應劉去後苔生閣
嵇阮歸來雪滿頭能說亂離唯有燕解偷閒暇不如鷗
千桑萬海無人見橫笛一聲空淚流

汧陽縣閣

汧水悠悠去似絳遠山如畫翠眉橫僧尋野渡歸吳嶽
雁帶斜陽入渭城邊靜不收蕃帳馬地貧唯賣隴山鷄

牧童何處吹羌笛一曲梅花出塞聲

邊上逢薛秀才話舊

前年同醉武陵亭絕倒閒談坐到明也有絳唇歌白雪
更憐紅袖奪金觥秦雲一散如春夢楚市千燒作故城
今日皤然對芳草不勝東望涕交橫

使院黃葵花

薄粧新著淡黃衣對捧金爐侍醺遲向月似矜傾國貌
倚風如唱步虛詞乍開檀炷疑聞語試與雲和必解吹

爲報同人看來好不禁秋露即離披

咸陽懷古

城邊人倚夕陽樓城上雲凝萬古愁山色不知秦苑廢
水聲空傍漢宮流李斯不向倉中悟徐福應無物外遊
莫怪楚吟偏斷骨野烟蹤跡似東周

和同年韋學士華下途中見寄

綠楊城郭雨淒淒過盡千輪與萬蹄送我獨遊三蜀路
羨君新上九霄梯馬驚門外山如活花笑尊前客似泥

正是清和好時節不堪離恨劍門西

江臯贈別

金管多情恨解攜一聲歌罷客如泥
江亭繫馬綠楊短野岸維舟春草齊
帝子夢魂煙水濶謝公詩思碧雲低
風前不用頻揮手我有家山白日西

奉和左司郎中春物暗度感而成章

纔喜新春已暮春夕陽吟殺倚樓人
錦江風散霏霏雨花市香飄漠漠塵
今日尚追巫峽夢少年應遇洛川神

有時自患多情病莫是生前宋玉身

傷灼灼

灼灼灼蜀之麗人也近聞貧且老俎落於成都酒市中因以四韻弔之

嘗聞灼灼麗於花雲髻盤時未破瓜
桃臉曼長橫綠水玉肌香膩透紅紗
多情不住神仙界薄命曾嫌富貴家
流落錦江無處問斷魂飛作碧天霞

漢州

北僮初到漢州城郭邑樓臺觸目驚
松桂影中旌旆色芰荷風裏管絃聲
人心不似經離亂時運還應却太平

十日醉眠金雁驛臨岐無恨臉波橫

長安清明

早是傷春夢雨天可堪芳草更芊芊
內官初賜清明火上相閒分白打錢
紫陌亂嘶紅叱撥綠楊高映畫秋千
遊人記得承平事暗喜風光似昔年

悼亡姬

鳳去鸞歸不可尋十洲仙路彩雲深
若無少女花應老為有姮娥月易沉
竹葉豈能消積恨丁香空解結同心

湘江水濶蒼梧遠何處相思弄舜琴

默默無言惻惻悲閒吟獨傍菊花籬只今已作經年別
此後知為幾歲期開篋每尋遺念物倚樓空綴悼亡詩
夜來孤枕空腸斷窻月斜輝夢覺時

六七年來春又秋也同歡笑也同愁纔聞及第心先喜
試說求婚淚便流幾為妬來頻斂黛每思閒事不梳頭
如今悔恨將何益腸斷千休與萬休

下邳感舊

昔為童稚不知愁竹馬閒乘遠縣遊曾為看花偷出郭
也因逃學暫登樓招他邑客來還醉僂得先生去始休
今日故人無處問夕陽衰草盡荒丘

太平廣記云莊幼時常在華州下邽

縣倚居多與隣巷諸兒會戲及廣明亂後再經舊里追思往事但有遺蹤因賦詩以記之

塗次逢李氏兄弟感舊

御溝西面朱門宅記得當時好弟兄曉傍柳陰騎竹馬
夜隈燈影弄先生巡街趁蝶衣裳破上屋探雛手脚輕
今日相逢俱老大憂家憂國盡公卿

送日本僧敬龍歸

扶桑已在渺茫中，家在扶桑東更東。
此去與師誰共到，一船明月一帆風。

對酒

何用巖棲隱姓名，一壺春酎可忘形。
伯倫若有長生術，一作應到如今醉未醒。

古離別

晴煙漠漠柳毵毵，不那離情酒半酣。
更把玉鞭雲外指，

斷腸春色在江南

立春日作

九重天子去蒙塵
御柳無情依舊春
今日不關妃妾事
始知辜負馬嵬人

白櫻桃

王母堦前種幾株
水精簾外看如無
只應漢武金盤上
瀉得珊瑚白露珠

寄江南逐客

二年音信阻湘潭
花下相思酒半酣
記得竹齋風雨夜
對床敲枕話江南

楚行吟

章華臺下草如煙
故郢城頭月似弦
惆悵楚宮雲雨後
露啼花笑一年年

離筵訴酒

感君情重惜分離
送我慙勤酒滿卮
不是不能判酩酊
却憂前路醉醒時

雨霽池上作呈侯學士

鹿巾藜杖葛衣輕
雨歇池邊晚吹清
正是如今江上好
白鱗紅稻紫蓴羹

臺城

江雨霏霏江草齊
六朝如夢鳥空啼
無情最是臺城柳
依舊煙籠十里堤

東陽酒家贈別

天涯方歎異鄉身
又向天涯別故人
明日五更孤店月

醉醒何處各霑巾

江外思鄉

年年春日異鄉悲
杜曲黃鶯可得知
更被夕陽江岸上
斷腸煙柳一絲絲

獨鶴

夕陽灘上立徘徊
紅蓼風前雪翅開
應為不知棲宿處
幾回飛去又飛來

庭前菊

為憶長安爛漫開
我今移爾滿庭栽
紅蘭莫笑青青色
曾向龍山泛酒來

燕來

去歲辭巢別近隣
今來空訝草堂新
花間對語應相問
不是邨中舊主人

倚柴關

策杖無言獨倚關
如癡如醉又如閒
孤吟盡日何人會
依約前山似故山

江行西望

西望長安白日遙
半年無事駐蘭橈
欲將張翰秋江雨
畫作屏風寄鮑昭

衢州江上別李秀才

千山紅樹萬山雲
把酒相看日又曛
一曲離歌兩行淚
更知何地再逢君

丙辰年鄜州遇寒食城外醉吟七言五首

滿街楊柳綠絲烟
畫出清明二月天
好是隔簾花樹動

女郎撩亂送鞦韆

雕陰寒食足遊人
金鳳羅衣濕麝薰
腸斷入城芳草路
淡紅香白一羣羣

開元坡下日初斜
拜掃歸來走鈿車
可惜數枝紅艷好
不知今夜落誰家

馬騎風疾玉鞭長
過去唯留一陣香
閒客不須燒破眼
好花皆屬富家郎

雨絲煙柳欲清明
金屋人間煖鳳笙
永日迢迢無一事

隔街聞蹴氣毬聲

宜君縣北卜居不遂留題王秀才別墅

本期同此卧林丘
櫓拙爐前擁布裘
何事却乘羸馬去
白雲紅樹不相留

明月嚴霜撲皐貂
羨君高卧正逍遙
門前積雪深三尺
火滿紅爐酒滿瓢

長安舊里

滿目牆匡春草深
傷時傷事更傷心
車輪馬跡今何在

十二玉樓無處尋

焦崖閣

李白曾歌蜀道難長聞白日上青天
今朝夜過焦崖閣
始信星河在馬前

搖落

搖落秋天酒易醒
悽悽長是別離情
黃昏倚柱不歸去
腸斷綠荷風雨聲

令狐亭

若非天上神仙宅，須是人間將相家。
想得當時好風月，管絃吹殺後庭花。

江上別李秀才

前年相送灞陵春，今日天涯各避秦。
莫向尊前惜沈醉，與君俱是異鄉人。

白牡丹

閨中莫妬新妝婦，陌上須慚傅粉郎。
昨夜月明渾似水，入門唯覺一庭香。

題酒家

酒綠花紅客愛詩
落花春岸酒家旗
尋思避世為逋客
不醉長醒也是癡

幽居春思

綠映紅藏江上邨
一聲雞犬似仙源
閉門盡日無人到
翠羽春禽滿樹喧

與小女

見人初解語嘔啞
不肖歸眠戀小車
一夜嬌啼緣底事

為嫌衣少縷金花

虎跡

白額頻頻夜到門
水邊蹤跡漸成羣
我今避世棲巖穴
巖穴如何又見君

南隣公子

南隣公子夜歸聲
數炬銀燈隔竹明
醉凭馬鬣扶不起
更邀紅袖出門迎

路德延

德延儋州巖相之猶子數歲賦芭蕉詩曰一種靈
苗異天然體性虛葉如斜界紙心似倒抽書詩成
翌日傳於都下會儋州坐事誅故德延久不能振
光化初方就舉擢第又爲感舊詩曰初騎竹馬咏
芭蕉嘗忝名卿誦滿朝五字便容趨絳帳一枝尋
許折丹霄豈知流落萍蓬遠不覺推遷歲月遙國
境未安身未立至今顏巷守簞瓢天祐中授拾遺
會河中節度使朱友謙領鎮辟掌書記友謙甚禮

之然德延浮薄動多忤物友謙解體德延乃作小兒詩以刺之

近體詩

小兒詩五十韻

情態任天然桃紅兩頰鮮乍行人共看初語客多憐臂膊肥如瓠肌膚軟勝綿長頭纔覆額分角漸垂肩散誕無塵慮逍遙占地仙排衙朱閣上喝道畫堂前合調歌楊柳齊聲踏采蓮沿堤行細雨奔巷趁輕烟嫩竹乘為

馬新蒲折作鞭鸚鵡金鏃繫猫子綵絲牽擁鶴歸晴島
驅鵝入暖泉楊花爭弄雪榆葉共收錢錫鏡當胸挂銀
珠對目懸頭依倉鶻裏袖學柘枝檀酒殢丹砂煖茶催
小玉煎頻邀籌箸掙時乞繡針穿寶篋拏紅豆粧奩拾
翠鈿戲袍披按褥尖帽戴靴氍毹展畫趨三聖開屏笑七
賢貯懷青杏小垂額綠荷圓驚滴沾羅淚嬌流污錦涎
倦書饒叱咤憎藥巧遷延弄帳燕綃映藏衾鳳綺纏指
敲迎使鼓筋撥賽神絃簾拂魚鈎動箏推雁柱偏碁圖

添路畫笛管欠吹鑄惱客初酣睡驚僧半入禪尋蛛窮
屋瓦採雀遍樓椽拋果忙開口藏鈎亂出拳夜分圍楫
拙朝聚打鞦韆折竹裝泥燕添絲放紙鳶互誇輪水碓
相教放風旋旗小裁紅絹書幽載碧牋遠鋪張雀網低
控射蠅弦詁語時時道謳歌處處傳匿窓眉乍曲遮路
臂相連鬪草當春逕爭毬出晚田柳傍慵獨坐花底困
橫眠等鵲前籬畔聽蛩伏砌邊旁枝粘舞蝶偎樹捉鳴
蟬平島誇趨上層崖逞捷緣嫩苔車跡小深雪履痕全

競指雲生岫齊呼月上天
蟻巢尋徑劖蜂穴遶堦填樵
唱迴深嶺牛歌下遠川
壘柴為屋木和土作盤筵
險砌高臺石危跳峻塔
塼忽升隣舍樹偷上後池
舩項橐稱師日甘羅作相
年明時方任德勸爾減狂
顛

羅虬

虬台州人詞藻富贍與宗人隱鄴齊名時號三羅
廣明庚子亂後去客鄜州李孝恭為從事籍中有
杜紅兒者善歌常為副戎屬意副戎聘鄰道虬請

紅兒歌贈之以綵孝恭以副戎所盼不令受之虬
怒拂衣而起詰旦手刃紅兒既而追其寃作絕句
詩百篇借古人以比其艷號比紅詩盛行於時

孫光憲云虬累舉不第依宦官得典本州書錦常
以展墓謁邑宰橫笏傲然宰曰某雖塵吏不達事
體然使君豈不看松柏下人乎虬有俊才所見有
比紅兒詩他無聞

近體詩

比紅兒詩

并序

比紅者為雕陰官妓杜紅兒作也美貌年少機
智慧悟不與羣輩妓女等余知紅者乃擇古之
美色灼然於史傳三數十輩優劣於章句遂題

比紅詩

姓氏看侵尺五天芳菲占斷百花鮮
馬嵬好笑當時事
虛賺明皇幸蜀川

匝匝千山與萬山
碧桃花下景長閒
神仙得似紅兒貌

應免劉郎憶世間

詔下人間選好花
月眉雲髻盡名家
紅兒若向當時見
繫臂先封第一紗

五雲高捧紫金堂
花下投壺侍玉皇
從道世間教不識
也應知有杜蘭香

渡口諸儂樂未休
竟陵西望路悠悠
石城有個紅兒貌
兩槳無因迎莫愁

傾國傾城總絕倫
紅兒花下認真身
十年東北看燕趙

眼冷何曾見一人


薄粉輕朱取次施大都端正亦相宜只如花下紅兒態
不藉城中半額眉

蘇小空勻一面妝便留名字在錢塘藏鴉門外諸年少
不識紅兒未是狂

一首長歌萬恨來惹愁漂泊水難迴崔徽有底多頭面
費得微之爾許才

梳子同心裛露垂折來深恐没人知花前醉客頻相問

不贈紅兒贈阿誰



御定全唐詩錄卷九十四